



KUVENDI I SHQIPËRISË

Komisioni për Veprimtaritë Prodhuese, Tregtinë dhe Mjedisin

Tiranë më, 5.3.2019

Dokument parlamentar

RAPORT PËR

PROJEKTLIGJIN “PËR RATIFIKIMIN E LETËRMARRËVESHJES NDRYSHUESE TË MARRËVESHJES SË FINANCIMIT, NDËRMJET REPUBLIKËS SË SHQIPËRISË DHE SHOQATËS NDËRKOMBËTARE PËR ZHVILLIM (IDA), PËR PROJEKTIN “SIGURIA E DIGAVE”, TË RATIFIKUAR ME LIGJIN NR.9965, DATË 24.7.2008”

- ***Hyrje***

Komisioni për Veprimtaritë Prodhuese, Tregtinë dhe Mjedisin, bazuar në nenet 32 - 38 të Rregullores së Kuvendit, në cilësinë e Komisionit përgjegjës, shqyrtoi projektligjin “Për ratifikimin e letërmarrëveshjes ndryshuese të marrëveshjes së financimit, ndërmjet Republikës së Shqipërisë dhe Shoqatës Ndërkombëtare për Zhvillim (IDA), për projektin “Siguria e digave”, të ratifikuar me ligjin nr.9965, datë 24.7.2008”, në mbledhjen e tij të datës 5 mars 2019.

Komisioni caktoi relator për këtë projektligj Zotin Besnik BARAJ.

Të pranishëm gjatë shqyrtimit të projektligjit ishin përfaqësues të Ministrisë së Ekonomisë dhe Financave, Ministrisë së Infrastrukturës dhe Energjisë, si dhe të KESH, sh.a.-së.

- ***Baza kushtetuese e projektligjit***

Projektligji “Për ratifikimin e letërmarrëveshjes ndryshuese të marrëveshjes së financimit, ndërmjet Republikës së Shqipërisë dhe Shoqatës Ndërkombëtare për Zhvillim (IDA), për projektin “Siguria e digave”, të ratifikuar me ligjin nr.9965, datë 24.7.2008” është nismë e Këshillit të Ministrave dhe i paraqitet për shqyrtim Kuvendit mbështetur në nenet 78, 83, pika 1, dhe 121 pika 1 të Kushtetutës.

Miratimi i këtij projektligji kërkon një shumicë të thjeshtë votash, sipas nenit 55, pika 1 e Rregullores së Kuvendit.

- ***Qëllimi dhe përmbajtja e projektligjit***

Ky projektligj ka për qëllim ratifikimin e letërmarrëveshjes ndryshuese të marrëveshjes së financimit për projektin “Siguria e digave”, ndërmjet Republikës së Shqipërisë dhe Shoqatës Ndërkombëtare për Zhvillim, ratifikuar me ligjin nr.9965, datë 24.7.2008.

Letërmarrëveshja ndryshuese përfaqëson komunikimin e Bankës Botërore, e cila njofton që, në mënyrë unilaterale, rialokon pjesën e mbetur të pashfrytëzuar, nga kategoria 3 e projektit në kategorinë 2 të tij, në funksion të shërbimeve të konsulencës së zbatimit për këtë projekt.

Projektligji është hartuar si rezultat i bashkëpunimit të Ministrisë së Ekonomisë dhe Financave, Ministrisë së Infrastrukturës dhe Energjisë dhe KESH, sh.a.-së, ndërsa letërmarrëveshja ndryshuese është përcjellë në mënyrë unilaterale nga Banka Botërore.

Projekti “Siguria e digave” është në kuadrin e programit për komunitetin e energjisë së Evropës Juglindore. Ky projekt ka si objektiv:

- Rritjen e sigurisë së digave të hidrocentraleve më të mëdha të sistemit elektroenergjetik shqiptar në kaskadat e lumenjve Drin dhe Mat;
- Rritjen e sigurisë dhe cilësisë së furnizimit me energji elektrike, nëpërmjet rritjes dhe përmirësimit të efikasitetit të prodhimit të energjisë elektrike nga burimet hidrike, duke ndikuar në këtë mënyrë edhe në rritjen e qëndrueshmërisë së sigurisë së furnizimit me energji elektrike në tregun rajonal të energjisë.

Përmes kësaj letërmarrëveshjeje synohet:

- Financimi i konsulentit të zbatimit të projektit për detyra të cilat janë përfshirë në kategorinë 2 të marrëveshjes, por për shkak të punimeve shtesë të evidentuara në rehabilitimin elektromekanik të HEC-it Koman, kërkon financim shtesë për supervizionin shtesë të punimeve rehabilituese elektromekanike të agregateve në HEC-in Koman. Gjithashtu, fonde të lira të angazhuara në kategorinë 3, në shumën 300 000 euro, do të kalohen në kategorinë 2, “Shërbimet e konsulentëve”, me qëllim mbulimin e kostove për supervizionin e punimeve dhe financimin e panelit të pavarur të ekspertëve për projektin “Siguria e digave”.
- I. Shtyrja e datës së mbylljes deri më 31.12.2020 pasi për realizimin e punimeve shtesë do të duhet kohë shtesë dhe për këtë arsye bëhet e domosdoshme shtyrja e datës së mbylljes së kredisë.
- ***Vlerësimi i Ligjshmërisë Kushtetuese dhe harmonizimi me legjislacionin në fuqi dhe aktet ndërkombëtare.***

Projektligji është në përputhje me nenet 78, 83, pika 1, dhe 121 pika 1 të Kushtetutës, si dhe me ligjin nr.43/2016, “Për marrëveshjet ndërkombëtare në Republikën e Shqipërisë”.

Në aspektin procedural projektligji është paraqitur në përputhje me Rregulloren e Kuvendit.

Në aspektin formal projektligji përbëhet nga 2 nene.

- ***Vlerësimi i përputhshmërisë së projektligjit me Acquis Communautaire***

Ky projektligj nuk përafron ndonjë legjislacion të BE-së.

- ***Diskutimi në komision***

Relatori i projektligjit u shpreh që kjo letërmarrëveshje ndryshuese krijon mundësinë për supervizim të punimeve shtesë që kanë dalë në kuadër të rehabilitimit elektromekanik të HEC-it të Komanit. Kjo do të realizohet përmes kalimit në kategorinë 2, “Shërbimet e konsulentëve” të fondeve të lira në kategorinë 3 “Shërbimet e Konsulentëve të Zhvillimit të Hidrocentraleve dhe Menaxhimit të Ujit”. Për shkak të këtyre punimeve shtesë lind nevoja edhe për shtyrjen e afatit të përfundimit të projektit.

Përfaqësuesit e Ministrisë shpjeguan elementët kryesor të kësaj letërmarrëveshjeje ndryshuese, e cila përfaqëson komunikimin e Bankës Botërore, ku njoftohet në mënyrë unilaterale, rialokimi i pjesës së mbetur të pashfrytëzuar, nga kategoria 3 e projektit në kategorinë 2 të tij, në funksion të shërbimeve të konsulencës së zbatimit për këtë projekt.

Diskutimet në Komision, u përqëndruan kryesisht në ecurinë e deritanishme të këtij projekti, si dhe në mundësinë e mbylljes së tij brenda afatit kohor të caktuar me këtë letërmarrëveshje ndryshuese.

- ***Përfundim***

Në përfundim të diskutimeve, Komisioni vlerësoi projektligjin për krijimin e mundësive për supervizionin shtesë të punimeve rehabilituese elektromekanike të agregateve në HEC-in Koman.

Komisioni e miratoi projektligjin në parim, nen për nen dhe në tërësi me të gjitha votat e anëtarëve të pranishëm dhe u shpreh dakord për kalimin e këtij projektligji për miratim në seancë plenare.

Besnik BARAJ

Niko PELESHI

Relator

Kryetar